

Gemeinsam Äntwert vum Här Premierminister, Staatsminister, a vum Här Aussen- an Europaminister op d'Fro n° 3431 vum 12. Januar 2021 vum honorabelen Deputéierten, dem Här Fernand Kartheiser

- 1. Kann d'Regierung déi Neiegkeet aus der New York Times confirméieren? Wa jo, wéi beurteilt d'Regierung dës Entwécklung am Hibléck op déi amerikanesch-lëtzebuergesch Relatiounen?**

D'Regierung kann déi Neiegkeet aus dem New York Times Artikel net confirméieren.

- 2. Ass de lëtzebuergesch Ambassadeur an den USA an de State Department convoquéiert ginn oder gouf et an iergend enger anerer Form en diplomatesche Protest vun den USA géint déi zitíert Aussoe vum Lëtzebuurger Ausseminister?**

De Lëtzebuurger Ambassadeur an de Vereenegte Staaten ass net an de State Department convoquéiert ginn an et gouf och keen aneren diplomatesche Protest vun de Vereenegte Staate géint déi zitíert Aussoe vum Lëtzebuurger Ausseminister.

- 3. Ass d'Regierung solidaresch mat den Aussoe vum Lëtzebuurger Ausseminister? Consideréiert d'Regierung den Här Trump als e „Verbriecher“?**

Et gëtt e kloren Zesammenhang tëschent dem Här Trump sengen Aussoe während senger Amtszeit a besonnesch no de Wale vum 3. November 2020 bis den Dag vum 6. Januar 2021, an der Gewalt déi sech deselwechte 6. Januar am Kapitol ofgespillt huet an déi Mënschen d'Liewe kascht huet.

- 4. Ass d'Regierung sech bewusst, datt keen anert europäescht Land an där Form op déi rezent Tëscheffäll zu Washington reagiert huet?**

D'international Communautéit ass sech eens dass d'Evenementer vum 6. Januar ronderëm de Kapitol e graven Ugrëff op d'Fundament vun der Amerikanescher Demokratie duergestallt hunn. Lëtzebuerg setzt sech ëmmer staark fir demokratesch Wäerter, Mënscherechter an de Rechtsstaat an, an eis Reaktioun op d'Insurrektioun huet dat refletéiert.

- 5. Ass d'Regierung der Meenung, datt déi Manéier, wéi de Lëtzebuurger Ausseminister dacks Positioun ergräift a sech ausdréckt, den Interessie vum Lëtzebuurger Land an der Welt déngt? Wann nee, wéi eng Konsequenze wëll d'Regierung dann aus där Erkenntnes zéien? Wa jo, wéi wëll d'Regierung dat argumentéieren?**

D'Membere vun der Regierung schaffen enk zesumme fir gemeinsam d'Interessie vun eisem Land ze verdeedegen. Den Ausseminister spillt eng wesentlech Roll an der Verriedung vun de Lëtzebuurger Interessien no baussen an huet di voll Ënnerstëtzung vun der ganzer Regierung fir säin Asaz.